

eductæ: quæ ubi in Græciam venerunt, classem illam cum qua superiore anno Veneti non fuerant ausi congregi, ad Venetarum rerum populationem Bosphoro egressam, ad portum quem *Septem porcos* dicunt, obviam habuit. Utraque alteram conspicata confestim se ad pugnam expediunt, magnoque deinde impetu confligunt; pugna quidem ab initio acerrima fuit, sed ut non in longum distracta, ita pro numero navium parum omnino cruenta. Genuenses fuga, quatuor amissis navibus, remis connixi in Epidauri portum se trepidi receperunt. Sed Ligur quatuor amissarum navium cladem paucis diebus refarsit, tribus Venetorum onerariis comineatu onustis subito incurfu interceptis. Et quanquam omnis vis belli circa insulas & ipsam Ægei maris oram, quæ a Peloponneso ad Hellespontum est, incubuisset, in Syria tamen haud res omnino quietæ erant, Venetis Ptolemaidem tenentibus, quibus omnes fere Italici generis homines, qui Hierosolymis erant, ita favebant, ut plane appareret, Venetis rebus eos magis quam Ligusticis studere: contra qui Tyrum incolebant, enixe favere Genuensibus. Quo accidit, ut omne Christianum nomen quod ea tempestate in Syria fuit, in duorum præpotentum populorum certamen erectum, tanquam in diversas factiones abierit: ipsæque interim urbes tanto labore ac sanguine a crudelissimo Mahomethi imperio quandoque vindictæ, infando bello ac sane detestabili mutuis se cladibus affligerent. Verum ne suarum rerum Veneti obliiti viderentur, tertio primi hujus Ligustici belli, seu (ut alii tradunt) quarto anno, triremes quinque ac quinquaginta, vel (ut quidam auctores sunt) septem & triginta in Genuenses hostes paravere: quæ in altum deductæ in Siciliam usque sunt progressæ; ubi rumor erat Ligusticam classem esse; sed hoste non reperto, in Syriam continuo cursum flexere, ac prope in conspectu Tyri, cæteam hostium navim adeptæ oppresse-runt. Quo successu & alacritate in portum delati, urbem quoque Veneti expugnare sunt adorti. Præsidio tunc urbi erat Andreas Barotius, homo impiger: is, quanquam ab Ptolemaide quoque Veneti copias accersissent, ut terra ma-

*Genuenses
victi ad Se-
ptem porcos
quatuor na-
ves amis-
sunt.*